

人物藝術隱逸

列女富賢

蔣光斗

武進陽湖縣志

卷之五

武進陽湖縣志

卷之五

PDG

人物

藝術

宋

韋叟善相宋武帝始爲鎮軍將軍桓攸令視帝當得州否叟曰得邊州退而私於帝曰君貴不可言帝笑曰若中當用爲司馬其後受晉禪叟詣之曰成王不負桐葉之言今不敢希鎮軍司馬得軍佐足矣卒與之

梁

蕭綸武帝子武帝好草書筆法頗古故簡文帝元帝及綸並能書

蕭賁字文奐多詞學工書畫雅性精密後來難比含毫命素動必依眞學不爲人自娛而已人罕見其迹偶遺畫扇上畫山水咫尺具萬里之勢雄厚特勝仕河東太守

陳

蕭乾字思惕齊豫章文獻王孫性簡雅善隸書得從父子雲法世祖授五兵尙書謚靜子

蕭引字叔休善隸書爲時所重高帝嘗披奏事指引署名曰此字筆趣翩翩似鳥之欲飛引謝曰此乃陛下假其毛羽耳後主朝爲中庶子建康令

隋

蕭吉字文休齊中書令懿之孫也博學多通尤精陰陽算術江陵陷遂歸周爲儀同宣帝時吉以朝政日非上書切諫不納及隋受禪進上儀同以本官太常考定古今陰陽書開皇閒帝陰欲易太子吉先上言太子當不安位帝異之由是每被顧問獻皇后崩上令吉擇葬所歷筮諸原至一處曰卜年二千卜世二百圖而奏之退告族人平仲曰二千者三十字也二百者取三十二運也太子得政隋其亡乎當有真人出治之矣煬帝嗣位拜太府少卿加位開府嘗經華陰見楊素冢上有白氣屬天密言於帝曰其後素家當有兵禍滅門已而元感反果應其言

唐

蕭誠梁之後起家奉禮郎開元初拜右司員外郎書太原題名一時無出其右爲司馬係書南嶽真君觀碑亦極有致趣弟諒官汝州刺史亦善書世謂誠真諒草

蕭祐字祐之少孤貧耿介苦學隱居以孝養聞自處士徵拜左拾遺元和末爲諫議大夫贈右散騎常侍精書及畫性閑澹貞退不以塵事自蒙賦詩鼓琴游心林壑號山林友云

暨生善占事汝州刺史桓臣範入考道過常適得東京緱氏莊奴婢初到桓問以莊上事暨云此莊姓盧不姓桓見一奴又云此奴婢卽走仍竊錢兩貫桓問今去改何官暨曰東北一千里外作刺史須慎馬厄行至揚州其奴果竊錢兩貫去至東京改瀛州刺史始

信之常懷馬凡至郡因拜跪左足忽痛難於行有人解鋤鋤訖痛
轉劇遂請告經百日停官其鍼人乃姓馬歸至東都於伊闕住其
緱氏莊賣與盧從愿諸事無不應者桓自此信命不復營求

宋

于琮善隸書學魏受禪表深得其行書意

孫時字季中以文學行義爲一州之望書法適麗得唐人筆意雖
片紙尺牘屬稿記未嘗草書政和三年試上舍授應天府姑熟縣
主簿再徙定陶授宣教郎致仕

董羽字仲翔善畫龍水海魚始仕江南歸宋後命在畫圖院藝學
嘗畫水於清德寺並玉堂北壁波濤洶湧望之若臨煙江絕島閒

後又命端拱樓畫龍水精心結構半載而成自謂當拜恩命乃因皇子見畫壁驚啼亟命圻塹卒不蒙賞

曹仁希字企之善畫水爲驚濤怒浪萬流曲折以至輕波細溜一筆之間自分深淺古今罕有及者徐友亦善畫水嘗於太平寺彌陀殿壁畫清濟貫河中有一筆起西北隅縈繞數十丈却立諦視疑飛濤騰涌後遭兵火寺盡焚惟殿獨存或謂水能厭之又戚舜臣有所畫水在蕭山縣覺苑寺佛座後壁濤瀾洶湧可駭化元不知於舜臣何屬家世畫水化元兼工魚龍嘗作龍歸入海圖筆力崢嶸有風浪起伏之勢

徐友諒少爲縣吏工畫草蟲傅色輕妙人皆稱之

帶

許迪工草蟲黃花紫茱青草紅葉妙臻神品吳璜善畫竹師文與可

於青言工畫荷花[甯]宗朝進所畫障授承節郎浙西安撫使計議官孫務道世其藝元時嘗以荷花圖附江東道宣尉同知錢經進由是顯名

許叔微字知可舉鄉薦省闈不第歸舟次吳江平望夜夢白衣人曰汝無陰德所以不第叔微曰家貧無資何以與人白衣人曰何不學醫吾助汝智叔微歸學醫凡有病者無問貴賤診候與藥不

受其直所活不可勝計後又舟次平望復夢白衣人以詩贈之曰
施藥功大陳樓閒處殿上呼臚喚六作五叔微不悟其意紹興閒
叔微以第六人登科因二名不錄遂升第五其上則陳祖言其下
則樓材方省前夢晚歲以已試之方併記其事實爲本事方撰論
尤富言傷寒者甚多其治法脉法推本張機更爲圖辨累數十卷
陳得一字晞夫崇甯閒乘桴至日本國得卷書上丹題付通微三
字乃天文星術也遂精推步學紹興五年日官言正月朔旦日食
九分半虧在辰正得一言當食八分半虧在巳初果如其言以御
史張致遠薦詔秘書少監朱震卽秘書省監視得一改造新歷得
一上推甲子之歲得十一月甲子朔夜半冬至日度起於虛中以

賜得一通微處士號與丹書題合所著書詔付太史尋歸隱聶墅
元

朱裕字敏道畫山水方君瑞畫草蟲兼工花鳥錢君用善畫禽鳥
堵信卿工草蟲

明

徐賁字幼文號北郭生洪武中徵起使晉冀還橐惟所賦詩累官
河南布政工書其楷法秀整端慎草書雄繁跌宕爲時所珍後徙
居吳之齊門

陳震英以禮部儒士考授主簿高尙不仕輕財好施不苟然諾善

書

唐世美號月樓善草書窮極奇變開闢閃縮上逼唐僧懷素詩歌亦有唐人風嘉靖中年八十餘詔賜冠帶

林良才字古峯廩生工詩文其書法尤爲人所推重一時碑版多出其手

白仲字子中尙書昂孫嗜酒落拓不羈學晉人書精妙絕倫

孫瓏號小癡生而穎敏善畫草蟲雪兔隨手點染卽有生態名重一時

呂敬甫善畫草蟲有生趣唐竹牕善畫亦以草蟲名

段銜能詩善畫山水尤工扇頭小景人爭寶之蔣鏗指揮使亦畫

吳之瑄人呼爲九蓮頭以自幼未冠也善畫人物瀟灑絕俗畫神佛則莊嚴端好晚年尤精巧絕倫能於寸楮上作西園雅集團

徐養浩先世本居毘陵其父於元兵屠城得脫復被掠至燕居久之得常州織染局官歸生二子長卽養浩博通儒書始業醫爲無錫州醫學教授子仲清繼其業尤精爲湖州路儒學教授子矩用以薦任襄黃兩縣教諭生三子述字孟魯迪字孟恂選字孟倫述善診迪善意述診決人生死旦夕歲月若神迪所治不盡責效於湯液醴酒率以意爲之述嘗過市市人躍而踰櫃請診曰子賜已斷當死市人曰吾方飽食而出無疾烏得死至暮果死一女傷於

怒內向臥不能轉迪診之因索花作婦人粧且歌且笑患者聞之不覺回顧大笑而愈一孕婦仰而探物遂不能俯迪令衣以裙數十層掖之眾中以漸而解每解一裙輒擲婦前解至中踰婦不覺用手力護因得俯一人病僂不能仰迪令之坐因以大鉗鉗徐僂之其人漸避漸仰其用意皆此類至用鉗尤多神效俗呼曰徐神仙然三人者皆負意氣好施與博物洽聞於諸家多所會心述尤工天文喜吟詩選更以孝友稱歲且除從宜興載米百斛還未至遍索故人與之家人方潔釜待炊弗恤也吳人周克恭者嘗有所託於選家人弗知也克恭歿選急走其家悉還之道遇一貧人寒甚急解襦與之述嘗夜讀宋史岳飛傳怒甚持挺起無所洩忿碎

其益於國下鄉人驚問之曰吾方切齒於權賊也汝武中廷選皆以他醫累當遠戍選贅得免述迪將奉母行選不忍也遂同行艱苦備嘗者二十年正統初述語族人曰天象如此不越三年萬乘其蒙塵乎旣而曰其在己巳也是年果有土木之變帝嘗召見述欲官之不果厚賜金帛以歸述與迪俱以高年終

王彥昭字文仲皇子右傅思明子以薦侍文皇於潛邸時彥昭未冠嘗被召應對如老成帝奇之命從金華戴元禮學醫得其禁方脉書以精慎稱每製上所用藥必與焉帝欲驗其精良凡藩府舊臣疾必遣診視時太子少師姚廣孝病頭風飲彥昭藥輒愈或問之曰病得之當風而坐清其頭目可也陳都督病傷寒彥昭曰法

富汗彥昭汗之愈王郎中弟亦患傷寒彥昭曰脉沈而實法當下
他醫汗之而死張主事之子得癰疾治之莫愈彥昭曰其脉沈手
足冷陰癰也作湯投之愈劉僉事自湘湖來有疾彥昭診之私語
其兄曰病在死法中不出月矣果如其言嘗從太監朱興尙寶朱
珍分領銅符司城門啟閉閒從帝出入軍中克著功績事定欲官
之以母老乞終養歸

吳傑字士奇_宏治閒以善醫徵至京師御史王鉞鎮大同聞傑名
以調治邊軍請臺省爭言醫如傑當在供奉不宜出之外地下禮
部試之果無踰傑者故事高等入御藥房次太醫院下者遣還傑
以諸醫待次久遣歸可憫願貶己秩偕入院尙書義而許之正德

獵還口出血傑進犀角湯愈後以幸虎園虎驚傷又試馬御馬監
腹倅痛傑療之無不立愈每愈輒進一官積至太醫院使前後賜
彪虎衣繡春刀及餘幣甚厚帝所游幸必以傑從時侍帝臥起欲
以禁衛銜授傑傑固辭乃止帝南巡獨不以隨以力諫失帝意也
旣而駕還清浦溺而病夢見傑亟召之因扈從還通州時江彬懼
帝不諱且見誅勸帝幸宣府傑出陽語彬以無恙入則力促請還
帝得崩於大內彬伏誅傑有力焉傑善診脉用藥不主古方甚有
與證若相鑿而卒無不效及進御則不得不用古方亦無不效者
年七十八卒子希孟進士戶科給事中希曾舉人

丁煥字伯文世爲小兒醫至煥而其術始精然性好飲痘疹時行無貧富貴賤爭致之一日診視常至百餘家家爭飲之煥不辭也多至沈醉握小兒手輒睡去主人覺之醒輒曰我知之矣歸至室則填街滿戶悉取藥者煥一一檢付雖甚危證悉效狀短小而謙下視之不知其有異術也卒之日家無餘蓄竟無子

湯玉湯玠皆世業婦人醫有奇效時有他醫視爲虛羸不敢輕藥者往往投以大黃而愈歲用至數百斤玠嘗行野見林有縊者釋之知其貿易得僞金也以藥資贈之空橐返于文佐兄子文英亦以醫著

湯啟暘字及泉亦世爲婦人醫性和易與物無忤與里中耆英其